

Удмурт Элькунысь кун архив удыс: толон, туннэ, чуказе...

Туала вакытэ тужгес но яркыт шодйське адыми обществолэн но цивилизациялэн азинскемзы, со воштйськонъёс ме́чак герзаськемын документальной наследиен, со кылдытэ калык дуннелэсь бадзым люкетсэ. Отын люкамын трос дауръёс чоже люкам тодон-валанъёс – гурт ужъёсты нуон адзос-чаклос, научно-технической азинскемъёс но открытиос, культурной наследиен. Ваньмыз со люкамын архив фондъёсын, кудъёсыз кылдыто калык дуннелэсь огъя ваньбурзэ.

Шаерлэн кун архивъёсыз – кунлыклен пусъёсыз пöлысь одйгез луо, общественной наукаослы инъет, калыклэсь мерлыко-эрикрадо куронъёссэ быдэстыны быгатйсь южьюртъёс луо. Туннэ нуналлы Удмурт Элькунлэн Архивной фондэз лыдья 3 миллионлэсь ятыр документ.

90 ар талэсь азьвыл кылдытэм архив удыслэн вань дыр куспын валтйсь мугез луиз Удмурт шаерлэсь Архив фондэзлэсь узырлыксэ утён но будэтон.

1918-1919-тй аръёсы РСФСР-ысь Совнаркомэн кутэм декретъёс архив удыс азинсконлы инъет сётйзы. Соку ик архив документъёс кунлэн собственностез луизы, Кун архивной фонд кылдытйзы.

1922-тй арын Вотской облысполкомлэн заседанияз эскеремын Архивной бюро кылдытонъя ужпумъёс. **1923-тй ар 2 коньывуон** Удмурт шаерысь кун архив службалэн кылдэм нуналэныз лыдьяське. Чапак та нуналэ облысполкомлэн Президиумез кутйз пунктэт «...архив материалъёсты одйг интые люкан-октон но огъя Архивной фонд кылдытон муген облысполкомлэн секретариатаз Областной архивной бюро радьян сярсысь». Валтйсь мугез: котькуд архивез лыдэ басытон но соослэсь ужзэс эскерон.

Нырысь ик Областной архив бюроен кивалтйз И.Я. Поздеев (толэзь пала ужаз). Озы ке но, областысь архив бюролэсь «пыд йылаз султон» вакытсэ герзало А.И. Галановлэн нимыныз. 1924 арын со архив удысэн кивалтйз, огдыре РКП(б)-лэн облысполкомысь испартотделэз нуиз. Жыны ар пала ужан куспаз, А.И. Галанов трос организационной ужпумъёсты радьяз. Татын со бадзым юрттэт шедьтйз И.А. Наговицынлэсь (со дыре ВАО-лэн облысполкомезлэн председателез). Кылсярысь, областной архивлы Совето Юртын (Дом Советов) висъямын юртъер, котькуд уездной исполкоме «...интыосын жегатскытэк архивъёс кылдытон, ужкагазыёсты утён, документъёсты утялтонэз радьян но областной архиве радызья документъёсты сётон сярсысь» А.И. Наговицынэн гожтэм циркулярной гожтэтъёс ыстэмын. Угось, 1920-тй аръёслэн кутсконазы шодйське архив документъёслэн трос быремзы, соосты тус-тас каремзы. Бумага тырмымтэен, учреждениос архив материалъёсты тыршизы макулатурае сётыны. Озы, чемысь вузаны шедьлйзы экономикалы но наукалы дуно луись документъёс.

«Архив фондлэн одйг документэз но, одйг бумага листэз но бырыны кулэ өвөл. Тодын возёно азылозэ, ортчемзэ тодытэк уг луы азыланьскон...». 1920-тй аръёсы верам кылъёс туннэ нуналэ но Удмурт шаерысь архив удысын ужась өнерчиослэн аспöртэм мереткылзы луо.

Архив фондэз узырмытон, документъёсты жикытан сярсысь бадзым уж нуиз А.И. Галанов интые областысь архив бюроен кивалтйсе пунктэм А.П. Симанов. Мылысь-кыдысь уж борды кутскем кивалтйсь РСФСР-ысь Центраархивен, Вятской губернской архив бюроен, тодосчиосын но шаерчиосын кусыпъёс кылдытйз. Чапак 1920-тй аръёсы шаерысьтымы Архив фондэ пыртэмын дунъяны луонтэм революцилэсь азыло кылдэм южьюртъёслэн документъёссы. Пусйымон, та дыре жутэмын вашкала учреждениослэн документъёссыс люканлэн но утёнлэн кулэлыксы сярсысь ужпум.

Архиве утиськыны вуылызы областысь ликвидировать карем учреждениослэн документъёссы. Со дыре ни өнерчиос валазы, котькуд архив делопроизводствеоз шонер радьян бордысен кутске шуыса, соин ик текущей делопроизводствеоз эскеризы. 1926-тй арын областысь Архив фонд лыдья ни вал 4 сюрслэсь ятыр документъёс.

1929-тй арын областной Архив бюрнын кылдытэмын исторической но Октябрь революци архивъёс. Со дыре ик, ёросъёс кылдытон вакытэ, уездной архивъёс быдтэмын, нош архив документъёс выжытэмын Архив бюрое. Со сяна, 1930-тй арын быдтэм испартотделлэн но документъёсыз интыямын Архив бюрое. 1935 арын коньывуонэ гинэ радъяськиз ВКП(б)-лэн Удмуртской обкомезлэн партархивез.

28 толшоре 1932-тй арын Удмурт облисполкомлэн пунктэтэныз Архив бюролэн нимыз воштэмын Удмуртской областной архивной управленилы, 1936-тй арын – Удмуртской АССР-ысь Центральной архивной управленилы. Вуоноез, кызь арлэсь трос кыстйськись вакыт, герзаськемын архив учреждениослэн НКВД системае пыременызы. 1939-тй арын пöсьтолэзе кылдытэмын УАССР-ысь НКВД-лэн архивной отделэз, нош 1940-тй арын отысь висьяськиз УАССР-ысь шор кун архив (ЦГА УАССР), жоген кун архивлэн люкетэз радъяськиз Сарапулын. 1942-тй арын Глаз, Воткинск но Можга каръёсын радъямын огазям ёрос-кар архивъёс.

Быдзым Отечественной ож кутскон азын архив хранилищеос складъёслы укшало вал: та дырлы архив документъёс лыдэ басьтытэк, связкаостэк, тузон улын радъятэк кыллизы. Озыен, азыпалан йöспöртэм жегыт уж сыйз. 4 ар куспын архивын ужасьёс котькуд фондлы дасязы опись, архивохранилищеосы интыян понна лэсьтйзы топографической валэкъянъёс, учетной документъёс нуизы. Озыен, справочной но исследовательской уж нуонлы луонлык кылдйз.

Архив удысын лэсьтйськонъёс öз дугдылэ Быдзым Отечественной ож аръёсы но. УАССР-ысь СНК юнматйз УАССР-ысь Кун архивной фонд сярись положение. Нырысьсэ ээплыко юнматэмын УАССР-ысь Кун архивной фонд валатон, эскеремын солэн пуштросэз, утён но уже кутон радыз.

Архив учреждениослэн НКВД-лэн системаяз пыремзы луиз кык пальем. Одыг палысеныз учконо ке, бадзым саклык висьяськыны кутскиз вашкала документъёсты утёнлы, архивын ужасьёс милиционеръёс радэ пунктэмын вал – отделэн кивалтйсь лейтенант погонъёс нуллйз, уждун но будйз.

Мукет палысен, ограничить каремын архивъёсы сюрон, сибегатэмын документъёсты уже кутон но. Кылсярысь, Быдзым Отечественной ож аръёсы биографической шöмъем вазиськонъёслы валэктонъёс сётъязы оперативной кулэлык дыръя гинэ, озы ик архивъёсысь документъёсын ужаны огшоры адямины луонлык öй вал.

1962-тй арын архив учреждениос сётэмын шаерысьтымы Министрьёслэн Советсылы, УАССР-ысь МВД-лэн архивъёсыя отделэз нимамын УАССР-ысь Министрьёслэн Советсылэн архив отделэз шуыса. 1969-тй арын архив отдел воштэмын Архив управлениен. Управленилэн кивалтэмез улсын ужазы шор кун архив но солэн Сарапулысь но Глазовысь филиальёсыз, 5 огазям кар но 24 ёрос архивъёс. Таёе тусын архив удыс азыланьтйз ужзэ 1980-тй аръёслэн пумозязы.

1991 арын 8 пöсьтолэзе кылдытэмын Удмурт Элькунысь Министрьёслэн Советсылэн архив ужъёсыя Комитетэз (али – Удмурт Элькунысь Кивалтэт бордысь архив ужъёсыя Комитет). Со аре ик архив службалэн системаяз пыриз РСФСР-ысь коммунистической партилэн Удмурт Элькун комитетэз (али – Удмурт Элькунлэн выль историезъя ужкагазъёсын центр), озы элькунлэн Архив фондэз трослыгес узырмиз.

Тужгес но шöдскымон вამыш архив удыслэн историзы луиз 1994-тй арын 7 толсуре кутэм «Удмурт Элькунлэн Архивной фондэз но архивъёс сярись кат», со чаклаз элькунысь архив удыслэсь кун политиказэ но азинсконзэ. 2005-тй 30 инвожое кутэм «Удмурт Элькунысь архив удыс сярись кат» тупатйз документъёсты утён, люкан, лыдэ басьтон но уже кутон радэз.

Туннэ архив ужъёсыя Комитетлэн кивалтэмез улсын ужало Удмурт Элькунысь шор кун архив, Удмурт Элькунлэн выль историезъя ужкагазъёсын центр, Мерлыко но эрикрано ужкагазъёсты утись кун архив (кылдытэмын 2003-тй арын), 31 муниципал архив. Соос утё бадзым но узыр ивортодэт. Туж вашкалаез документ утемын 1709 арысь.

Соос пöлын пумисько уникальной, быдэс Россилы зэмос раритет луись документъёс. Огез соос пöлысь – Петр Ильич Чайковскийлэн вордиськемез сярысь метрика книгаын гожтэм. Пусьёно, котькуд ар Архив фондлэн быдзалаез йылэ шуыса. Архивъёсы всяклы утиськыны воу Удмурт Элькун Кивалтэтлэн, гурт возёсьёслэн, кун учреждениослэн но предприятиослэн, мер огазеяськонъёслэн, озы ик кун но мер удисьёсысь сюлмо адямиослэн, тодосчиослэн, гожьяськисьёслэн, Граждан но Быдзым Отечественной оже пыриськемъёслэн документъёссы.

Шаерысьтымы архивъёсын утиськись документъёс жажыос вылын огшоры уг кыллэ, соос уже кутисько пöртэм амальёсын: калыклэн вазиськонъёсызлы валэктонъёс сётисько, радьясько адзытонъёс, экскурсиос, пото документъёсын сборникъёс, справочникъёс, газет но журнал бамъёсын печатласько архив документъёсья дасям статьяос. Озы архивысь документъёс юртто калыклэсь тодон-валанъёссэ муромытыны, вашкалазэ гажаны но ортчеззэ дышетыны.

Удмурт Элькунысь архив удыслэн 90 ар куспын азинскемез шöдскымон. Уже пычатйське калыклы юрттэт сётонэз электрон амалэ выжытон. Озы, вазиськонъёс воу шаермылэн пöртэм сэрегёсысьтыз но, кунгож сёрысь но. Вазиськонъёсын ужаны луонлык кылдытэмын «Одйг укно» режимын. 2012 арысен татчы пырисько ни муниципал архивъёс но. Кун архив удыслэн сайтаз луонлык вань тодматскыны тужгес информативной справочникъёсын, интернет-адзытонъёсын, статьяосын. Берло дыре бадзым саклык висьяське архив документъёсты цифровой форматэ берыктонлы. Туннэ нуналлы 57 сюрс пала документъёс выжытэмын ни электрон видэ. Жоген луонлык кылдоз Интернет пыр соосын тодматскыны но ужаны. Архив ужёсья Комитетэн кивалтйсьлэн Н.В. Тойкиналэн верамезъя, цифровой форматэ берыктон бумага вылын дасям документлэсь подлинниксэ утёнлэсь уз бушаты. Шаерамы улйсь калыкъёслэсь историко-культурной наследизэс эскертон но бюджетон – архив удыслэн котькуд вакытлы валтйсь ужпумез луоз.

Удмурт Элькунысь шор кун архивысь
научно-исследовательской но методической уж нуонья
отделэн кивалтйсьлэн воштйсьез



Е.С. Воронцова